

PNB agih pendapatan, bonus RM11.1b

Kuala Lumpur: Permodalan Nasional Berhad (PNB) mencapai prestasi kewangan berdaya tahan bagi tahun kewangan berakhir 31 Disember 2020 dengan mengagihkan pendapatan dan bonus RM11.1 bilion kepada pemegang unitnya.

Secara keseluruhannya, PNB mengagihkan jumlah agihan pendapatan terkumpul RM211.3 bilion kepada 14.5 juta pemegang unitnya sejak awal penubuhan.

Pengerusi Kumpulan PNB,

Tan Sri Dr Zeti Aziz berkata, 2020 adalah tahun paling mencabar dalam sejarah, namun PNB memperoleh hasil ketara daripada strategi transformasi yang dilaksanakan sejak 2018.

Katanya, PNB berjaya menghadapi satu lagi iklim pelaburan sangat mencabar dan dapat menghasilkan tiga pencapaian memberangsangkan pada 2020.

"Kami mengekalkan prestasi kewangan berdaya tahan, mencapai kemajuan ketara dalam usaha kepelba-

gaian portfolio dan meningkatkan lagi pengalaman pengguna kepada pemegang unit terutama menerusi platform digital.

"Hasilnya, PNB meningkatkan Aset Di Bawah Pengurusan (AUM) kepada RM322.6 bilion dan terus memberikan pulangan kompetitif berjumlah RM11.1 bilion sepanjang tahun ini.

"PNB terus mengorak langkah menjadi institusi pelaburan diiktiraf dunia.

"Selain strategi baharu untuk mempelbagaikan pe-

laburan kelas aset yang lebih luas di pasaran domestik, kemasukan kami di pasaran antarabangsa juga meningkat secara progresif.

"Kini, kami juga mengintegrasikan agenda kelestarian ke dalam pelaburan kami," katanya pada taklimat laporan tahunan PNB bagi tahun kewangan berakhir 31 Disember 2020 secara maya di sini, semalam.

Hadir sama, Presiden dan Ketua Eksekutif Kumpulan PNB, Ahmad Zulqarnain Onn.



ZETI dan Ahmad Zulqarnain pada taklimat laporan tahunan PNB bagi tahun kewangan berakhir 31 Disember 2020 secara maya, semalam.